

27.09.2018

UKA2018/121

Naqqiut

Siunnersuut 28. februar 2018-meersoq taarserpaa

(Makku naqqiutigineqarput: Oqaatsimut atorneqartumut "oqaasileriffik"-mut taarsiullugu atorneqarpoq "oqaasiliortut" Naqqiutit taasissutissami aammalu tunngavilersuut. Siunnersuutip danskisoortaani naqqiissutitaqanngilaq.)

Inatsisartut suleriaasianni § 33 naapertorlugu Naalakkersuisut peqquneqarnissaannik Inatsisartut aalajangiiffigisassaattut siunnersuut matumuuna imaattoq saqqummiuppara:

Taaguutininik akuersissuteqartarnermi Oqaasiliortut sulinerat nalilersuiffigeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

Nalilersuineq inaarsarneqassaaq UKA2019 tikitsinnagu, kalaallisut taaguusersuinerup ineriartortinneqarnissaanut suliat annertusarnissaannut innersuussutinik aamma imaqartinneqassaaq.

(Siumup inatsisartunut ilaasortaaitai)

Tunngavilersuineq:

Ukioq 2017-imi Inatsisartut inatsisaat nr. 5 junip aallaqqaataaniit 2017-imeersoq, Oqaasiliortut pillugit atuutilerpoq. Taamaalilluta akuersissutigiarput oqaatsivut suliamut tunngasutigut Oqaasiliortunit akuersissutigineqartassasut. Oqaasiliortut oqaatsivut suliamut tunngasutigut akuerineqartarnissaat siunertaralugu suleqatigiissitanik suliamut tunngasutigut ilisimasalinnik pilersitsisassaaq, taakkualu Oqaasiliortunut siunnersuuteqartassapput¹. Tamatta isumaqatigiissutigisinnaagunarparput oqaatsivut suliamut tunngasutigut inerisartariaqalivissut, ingammik qiviarutsigu qanoq suliamut tunngasutigut oqaatsinik amigaateqarluinnartigaluta – aap, tassuunatigut takussutissaqarpaluppoq oqaatsit suliamut tunngasutigut inerisarnerat pissusissamisuumngitsumik ingerlasut.

Oqaluuserisatta pingaaruteqassusia paasissagaanni, qanorlu eqqorluinnartunik taaguusersuinissarput, atuutlernissaat atulernissaallu pisariaqartigisoq, taava Tunngaviusumik inatsisissaq pillugu suliaq assersuutissaqqippoq, tassami allakkat toqqortaait assigiinngitsut takutimmassuk kalaallisut oqaatsivut suliamut tunngasutigut nutserneqarsimanerat assigiinngitsorujussuusut, soorlulusooq assersuutissaqqittoq tunngaviusumik inatsisissap taaguutaa nutserneqartarsimammat assigiinngeqisunik isumalersorlugu. Tunngaviusumik inatsiseqalernissap suliaq ataasiakkuutaartumik assersuutaannaavoq.

Assersuutit allat taakkartussagaanni departementit aammalu uagut qinikkat, ulluinnarni sulinitisinni iluaqutigilluavissorsinnaagaluaripput oqaatsivut suliamut tunngasutigut erseqqissuliutiginuuppara. Innuttaasutaaq aamma ersarissumik akissuteqarfiginissartik pisariaqartittuaannarpaat pisortanut

¹ Jf. § 2, stk. 1 og 3 i Inatsisartutlov nr. 5 af 1. juni 2017 om Grønlands Sprogævn

saaffiginnikkaangamik. Inatsisitigut ilinniartitaanermi nutaami ilinnialertussat aamma iluaqutigilluarsinnaavaat oqaatsivut suliamut tunngasutigut inerisarluarneqalertuuppata, taamaalillunimi siunissami inatsisilerituujusussat kalaallisut oqaatsivut atorluarlugit fulmægtigitut sulinermini ullumikkornit periarfissaqarnerulissammata.

Soormiuna suliaq tassungaannaq killeqqasooq? Arlaatigut amigaateqartoqarpa? Suliassat pisortatigoornerusumik imaluunniit inuppalaarnerusumik suliassaappat? Oqaasiliortut ilumut siumungaaq isigalugu oqaatsinik akuersisarnerminni kisimiittuarsinnarluni suliamik kisermaassissava? Apeqqutigineqarsinnaasut ilagilluinnarpaat uani siunnersuutigisanni naliliisoqarnissaa eqqarsaatigaanni. Kissaatigaara akissuteqarfigineqassasooq, qanoq ililluta oqaatsivut suliamut tunngasutigut siumungaaq isigaluta inerisarsinnaaneripput.

Aningaasatigut allaffissornikkullu pisortanut sunniutissai

Missingersorneqarpoq, naliliineq innersuussutinillu suliaqarnissaa AC-erimik affarmik naleqassasooq, 250.000 kr. missaanni.

Namminersorlutik inuussutissarsiutilinnut aningaasatigut allaffissornikkullu sunniutissai

Soqanngilaq.

Innuttaasunut aningaasatigut allaffissornikkullu sunniutissai

Soqanngilaq.